



Si bo yag riba dos  
yuana pareu, bo  
no ta kue ningun di  
nan.

EDITOR:  
Bonaire Communication Services N.V.

Djaweps 11 mei 2023

Preis: \$1.25

# AMTENAR NO TIN RESTRIKSHON PA MANIFESTÁ

Bahia na Lagun



*E potrèt di awe ta pa kortesia di Riglen Makaai. Ku su Mavic Air Quadcopter Lens 35mm Format Equivalent 24mm, resolushon 3840×2160, el a kapta imágen di bahia na Lagun. E sakamentu di potrèt a kuminsá pa su proyektonan. Entretantu esaki a bira su hòbi. Pronto nos lo publiká un entrevista ku Riglen unda e ta konta di proyektonan ku e ta okupá kuné. E palabranan ta formá ku slòf i sapatu ku ta yega kosta. FB; RF Makaai.*





# Minister Jetten a bishitá palunan di mangel

KRALENDIJK--Minister di Klima i Energia Rob Jetten huntu ku su delegashon, tabata di bishita serka Mangrove Maniacs Bonaire. A bai ku e minister na e palu di mangel na Lac. Boluntarionan di e organisashon a duna Jetten i su delegashon splikashon amplio riba importansia di palu di mangel i di e trabou nan ku e organisashon a bin ta hasi. Despues di e splikashon, e minister a drenta den lodo i duna boluntarionan un man ku ko bamentu di un kanal nobo. Palunan di mangel ta hopi importante pa biodiversidat i pa fortalecé kosta kontra kondishonnan klimátiko ekstremo. Nan ekosistema ta importante pa turismo i piská. Palunan di mangel por hunga un papel importante den solushonnan basá riba naturale-sa. Esaki, dor di adaptá nan mes na e efekto di kambio di klima.

Desafortunadamente palu di mangel ta enfrentá algun reto. Eroshon i mal sirkulashon di awa ta hunga un ròl. Esaki ta resultá den morto kontínuo di palu di mangel. Basá riba konose-mentu di piskadó, imágen di satélite i investigashon lokal, Mangrove Maniacs ta habri kanal pa restorá sirkulashon di awa.

A diskutí tambe riba ret di koperashon entre e seis islanan karibense hulandes. E Minister a enfatisá e importansia di un enfoke regional. Intenshon ta pa establecé un mesa klimátiko na Boneiru i ku minister uza e informashon atkerí pa tur e islanan.

Fotonan di Casper Douma.



## Pronóstiko di tempu pa Boneiru

Djárason 10 te Djaweps 11 Mei 2023  
Periodo ku solo i prinsipalmente seku

Tin periodo ku solo i prinsipalmente seku. E temperatura máksimo lo ta 31°C, e temperatura mínimo 27°C. E bientu ost ta basta fuerte, forsa 5, de bes en kuando fuerte, forsa 6 Bft.

Altura di ola: 2,0-2,5 m (6-8 pia).

\* Altura di ola válido pa laman grandi

	Djam	Djár	Djaw	Djab	Djas	Djad
	Mei 9, 2023	Mei 10, 2023	Mei 11, 2023	Mei 12, 2023	Mei 13, 2023	Mei 14, 2023
Temperatura máksimo	31	31	31	31	31	31
Temperatura mínimo	27	27	27	27	27	27
Yobida (mm)	0	0	0	0	0	0/2
Yobida (%)	10	10	10	10	20	20
Solo (%)	30	40	50	50	50	50
Bientu	< 0 6	< 0 5	< 0 5	< 0 5	< 0 5	< 0 5

### Bo tabata sa ku.....

ku ora un bebi nase , su kabes ta representá kasi un tersera parti di hinter su kurpa?



# AMTENAR NO TIN RESTRIKSHON PA MANIFESTÁ

**KRALENDIJK-** Entidat Públiko Boneiru (EPB) i RIjksdienst Caribisch Nederland (RCN) ta hasi bon kla na komunidad kompleto ku tur ámténar ta liber pa partisipá na e manifestashon di djabièrnè 12 di mei. Despues ku a surgi algun rumor persistente indikando ku EPB i RCN a prohibí ámténarnan di partisipá na e akshon di pueblo aki.

“Apsolutamente no ta

kuadra ku a prohibí ámténarnan. Di ami su banda sigur i tampoko di niun otro miembro di Kolegio Ehekutivo”, diputado Henryson Thielman ta bisa. El a enfatisá ku MPB sigur ta respetá e libertat aki di kada siudadano.

Konsehero di MPB ta bisa ku el a stimulá su propio gremio familiar pa sostené e kousa. “MPB ya a logra hopi riba e tereno aki pero ainda tin un kaminda

largo pa bai. Pues ami i mi hendenan ta sostené e kousa”, Elvis Tjin Asjoe a bisa.

Ta trata aki di e manifestashon ku e nòmber ‘huntu kontra pobresa’. Vários organisashon a uni forsa pa ku e lucha pa igualdat aki. Entre otro AFBW, USIBO, UNKOBON, FNV, Greenpeace, Piskabon i tambe partido polítiko M21. Boneiru tin 13 aña ta warda pa Hulanda stipulá un mínimo sosial. Ku e ak-

shon aki e organisadónan ku manda un señal fuerte pa Den Haag, no ta aseptá mas tardansa pa stipulá e mínimo sosial.

Awor ta bisa ku probablemente kantidat grandi di ámténar lo no partisipá pa motibu ku nan dunadó di trabou a prohibí esaki. Segun tur e partidonan envolví esaki no ta kuadra, pues tur hende ta liber pa partisipá. Robert Sances di sindikato ABVO ta bisa ku e no a risibí niun señal di un prohibishon. “Tur hende por partisipá si nan ke. No ta trata di un wèlga òf algu por estilo”.

Sances a splika ku ABVO ta sostené e akshon pero no ta partisipá aktivamente. “Debí ku tin elekshon di direktiva ku ta planiá fo’i aña pasá i esei ta sagrado pa nos. Echo ta ku tur lucha pa bienestar general nos ta sostené”, el a agregá. ABVO a manda un mensahe pa USIBO ofresiendo nan sosten na e akshon.

Pa RCN mester ta bon kla ku kada ámténar por partisipá. “Tur hende tin

derecho pa demostrá i duna nan opinion”, Lucia Beck, hefe di departamento di komunikashon ta bisa. Sí e ta agregá ku kada ámténar mester tene kuenta ku kontinuashon di trabou.

Konsekuentemente Tim Muller komo direktor di RCN a manda un mensahe pa tur hefe di departamento den kua e ta suprayá ku tur trahadó tin libertat pa partisipá na e manifestashon i ku esaki lo no kosta ora di fakansi.

Esaki den mayoria kaso lo no ta un problema mirando ku pa ámténarnan un siman di trabou ta konsistí di 36 ora.

BONERIANO a tuma kontakto ku Nochi Willem konsehero di USIBO ku a splika ku e no a tende e rumornan aki. “Mi no a atendé nada pero pa sigur mi a manda puntra diputado Thielman”, Willem a bisa. Tambe nos a komprondé ku USIBO a hasi petishon na ABVO pa hasi yamada nan su miembronan pa sosten’é kousa. Pues no solamente sosten riba papel pero partisipando na e akshon.

## Pa sektor di turismo

### Boneiru bon representá na Barbados

**KRALENDIJK—** BONHATA huntu ku Tourism Corporation Bonaire, Captain Don's Habitat Bonaire, Grandwindsockbonaire i Delfins Beach Resort lo representá Bonaire e siman aki na Caribbean Marketplace 2023. E evento ta organisá pa

Caribbean Hotel & Tourism Association. Barbados lo ta anfitrión pa e evento. Mester bisa ku esaki ta promé biá ku e isla ta organisá e evento.

Meta di Boneiru su partisipashon ta pa topa ku komersiantenan rònt mundu ku ta ta promové e isla. Boneiru su represen-

tantenan ku nan partisipashon tin e posibilidat pa sigurá reservashon nan, fortalese relashon ku klientenan aktual, hasi kontakto nobo i reklutá posibel klientenan nobo. Tambe e partisipashon ta oumentá Boneiru su visibilidat den mundu turístiko.



## SPESIAL RIBA AVISO PA Dia di mama

Personalisá bo propio mensahé ku un foto huntu ku bo mama i manda esaki na

avisobon@gmail.com

Pa solamente \$42,40





*Broertje Finies a fayeré*

# Papel krusial den mapa topográfiko di Boneiru

**KRALENDIJK** – Djárasón tabatin entiero di Broertje Finies. Tiki ta e hendenan ku ta na altura di e papel importante ku e persona aki a desplegá den realisashon di un mapa topográfiko di Boneiru meimei di dèkada sesenta. Broertje a reklutá algun hòMBER fuerte di spesialmente su bario Rincon pa drenta mon-di, subi seru, krusa den e palunan di mangel na bahia di Lac, pa realisá e mapa topográfiko ku te awe Kadaster ta usa. Nan tabata kontratá pa KLM Aerocarto.

## *Pa Bòl Antoin*

Serrio Iraides Finies a nase dia 22 di sèptèmber 1937 na Rincon, Boneiru. Su tata, Hosé, tabata un hòMBER di mondi, hòMBER di kunuku i vitó di plantashinan Karpata i Oni-ma di famia Hart. Di mes su yu hòMBER Broertje tambe a lanta ku konosementu di mondi, di seru i terenonan rondó di Rincon.

“Mi a sali for di Boneiru pa traha na Aruba na fin di añanan sinkuenta. Un famia di ku tabata traha na DOW Kòrsou a bisa mi ku nan tabata buskando hende riba e isla ei pa traha pa KLM Aerocarto. El a splika mi ku nan tabatin mester di hende pa drenta mondi pa pone e puntonan topográ-

fiko pa Kadaster. Nan a tuma mi den servisio i trabou a kuminsá”, Broertje Finies a konta.

E trabou tabata duru, pero pa Broertje esaki no tabata un problema grandi. E tabata konosé mondi bon, algu ku el a heredá di su tata, ku a siñ’é kiko ta mon-di. No tabatin niun mondi den besindario ku el a krusa huntu ku su tata, ku tabata atendé ku kunukunan Karpata, Colombia i Karpata pa famia Hart.

## *KLM Aerocarto*

Na 1921 fundadó i presidente di KLM Albert Plesman a instituí Photo-Technical Cartographis Service FCB, komo un servisio di KLM pa saka foto aéreo.



Plesman a predisí e tempu ei kaba ku fotografia aéreo lo a bai bira algu grandi den mundu, partikularmente den mundu komersial, ku e tempu ei ya kaba a kontratá FCB pa numeroso enkargo.

Fotografia aéreo tabata kompletamente nobo den e dianan ei. Promé guera Mundial a duna fotografia aéreo un ‘boost’ grandi. Despues di esei aviashon sivil tambe mas i mas a kuminsá pensa den e direkshon aki.

FCB tabata situá na e aereopuerto Waalhaven na

Rotterdam desde su establecimiento na 1921, pero despues di Segundo Guera Mundial e kompania a move pa algun barak na Schiphol.

Avionnan di FCB tabata lanta kasi tur dia pa saka panoramanan di Amsterdam i otro siudat i áreanan na Hulanda.

E enkargonan ku FCB tabata haña no tabata inklui solamente trabou den aire, sino tambe riba tera, pa asina pone teritorionan riba mapa na un forma mas korrektu posibel.

Relato anual di KLM a indiká ku na 1947 FCB a realisá 569 tarea, entre otro fotonan pa registrá rekonstrukshon di Hulanda despues di guera.

Na fin di dèkada sesenta

e operashon aki, ku mien-trastantu a haña e nòmber di KLM Aerocarto, a haña tarea riba e islanan antiano.

Mayoria di e mishonnan aki na islanan ABC KLM Awerocarto a realisá ku avionnan Dakota modifiká.

## *Mondi*

Broertje Finies a konta: “Semper mi tabata un aventurero, hende di mondi, pues e trabou no tabata duru pa mi. Mi tabata gusta mondi. Ofisina di Aerocarto tabata situá banda di Teater Roxy. Mi a traha algun tempu na Kòrsou, pero despues nan a manda mi Boneiru, kamin-da tambe mester a bai pone e isla aki riba mapa.”

Na momentu ku el a yega Boneiru Broertje Finies a haña enkargo pa forma un tim dim hende ku por a traha den mondi. Pasobra e trabou di midimentu i pone e punto òd markanan di Kadaster mester a sosodé mayoria den mondinan salbahe di e isla.”

Di mes Broertje a bai buska trahadó den su bario Rincon. El a delegá e tarea aki na Enrique (Riki) Balentin, ku a skohe un grupo hòMBERNAN rinkonero fuerte pa traha. Broertje: “Mi ta kòrda ku den e gru-



*Fotógrafonan di KLM Aerocarto den akshon.*





po aki tabatin Domingo Cicilia, Odulio Mercera, Nino Vlijt, mi rumannan Goito i Jack, Ruby Balentin i diferente mas. Nan tabata krusa mondi pa, den kordinashon ku e hendenan di KLM Aerocarto' pa pone e pun-

tonan kadastral. Por ehèmpel mester a subi serunan di Brandaris, Yuwa, Wekuwa i diferente mas."

### Anochi

Nan no tabata traha solamente den dia. Tin biá

ku nan tabata traha anochi tambe den mondi i riba seru, usando flèshlait. Broertje ta kòrda ku riba Brandaris i Yuwa tabata hopi friu anochi. "Nos a keda rancha un siman na Klein Boneiru na momentu ku nos mes-



ter a bai midi i traha e piláan. Dòdò Weiman i Libo a hiba nos ku boto di lots. Nico Winklaar tabata trese material pa traha e piláan. Tambe profishon pa nos kuminsá."

E trabou di mas duru, segun Broertje, no tabata den mondi i riba serunan di Boneiru. Mas duru nan a traha den e palunan di mangel den bahia di Lac.


Broertje Finies: "Nunka no tabatin askidente den

seru òf den mondi. Na Lac si tabatin aksidente, anke no grave. Trahadónan tabata kai i kòrta nan kurpa ku machete."

Broertje a hasi e trabounan aki tambe na e islanan Saba, St. Eustatius i St. Maarten. Na Statia nan tabata hür buriku pa 10 florin pa dia pa por a bai pone e piláan riba seru. Ora ku e trabounan a kaba e tambe a stòp. E ta un aventurero i a bai dediká su bida na piskamentu.



Riki Balentin



Domingo Cicilia



# Ròl provinsial direkshon Boneiru

## KRALENDIJK

Mester re-konsiderá e posishon estatal di Boneiru, St. Eustatius i Saba na 2010 den e pais Hulanda. E konseho urgente akí èks minister Ed Nijpels ta duna Gabinete Rutte.

Durante un investigashon na e posibilidatnan pa institushon di un mesa di klima na Boneiru, Nijpels a bin dal kontra di loke ketu bai na Karibe Hulandes ta keda eksperensia komo fout i e orígen lo ta ku e ministerionan no ta aktua efektivu pa loke ta trata e munisipionan partikular. Ku Den Haag ta lubidá e islanan den e maneho di klima nashonal, ta un ehèmpel ku ta papia pa su mes.

“Pa mi e pregunta ta, sí e konstelashon gubernamental skohé na 2010 pa Karibe Hulandes ainda ta



e forma mas adekuá i no ta demostrá muchu deterioro. Despues di 13 aña, segun mi rekomendashon mester di un konstrukshon di nobo i fundamental.

Gubernamentalmente no ta salú ku un kantidat di departamentu ta atendé direktamente ku e entidadnan públiko di respektivamente 24.090, 3.293

i 2,035 habitante. Esei ta duna un grado haltu di koheshon gubernamental,” Segun Nijpels, kende a presentá su rapòrt djaluna.

Den e kuadro di e konseho, segun Nijpels, el a papia ku un kantidat di esnan enbolbí tokante e pre historia di e konstrukshon skohé ku e tempu ei ku a evitá di papia tokante

e variantenan. For di un parti di e kombersashonnan, e por a saka afó ku e falta di e kapa entre Reino i munisipio di un gobièrnu provinsial, ta keda konsiderá pa hopi komo un fout ku a skohe pe den e konstelashon na 2010.

Algún di esnan enbolbí ta yama un provinsia komo un partner muchu natural pa e tres munisipionan partikular, komo un bon medio pa minimalisá e preshon riba e gobièrnu aktual.

Nijpels: “For di kontaktonan gubernamental, a sali na kla ku e provinsianan konhuntamente ta dispuesto pa sigui konsultá mas aleu ku e mandatarionan responsabel tokante e posibel ròl den direkshon di islanan BES. Bou di e bandera di IPO, ta lantando un relashon di

koperashon entre islanan karibense, bou di presidencia di e komisario di Rei na Gelderland.

Meta di e koperashon akí ta pa banda di ekspertesio departamental i di munisipio eksistente, hasi uso tambe di konosementu provinsial na e área karibense.

Mi ta konsehá Gabinete pa riba término kòrtiku konsultá ku e relashon di koperashon pa determiná kiko ta e posibilidatnan.”

Segun Nijpels, e iniciativa akí por kondusí na sosten efektivu riba tereno di personal i finansiero.

Pa no keda pegá den muchu konsulta, e ta proponé pa bini konkretamente ku un taksforce di e 12 provinsianan, munisipio i paisahe di awa, pa asistí Boneiru.

## BIATA ku charla pa partisipantenan

**KRALENDIJK--** Djamars 9 di mei Bonaire Internashonal Art & Talent Academy, BIATA tabatin nan promé charla pa e partisipantenan. E tópiko tabata mundu di beyesa. Esaki a tuma lugá

na Plaza Resort Beach Bonaire ku ta fungi alabes komo sede di e organisashon. Durante e seshon a trata tópikonan manera evolushon di mundu di beyesa, tipo di reinanan ta destakando internasho-

nalmente, komportashon, uzo di medio sosial i maneho di tempu.

Na final di e anochi kandidatanan a pone riba papel, un meta dirigí pa

ku nan partisipashon den e temporada di Miss Teen Bonaire 2023.



Siña di bo historia, kultura i naturalesa



TELBO kanal 70 Flamingo TV kanal 23



*Eks Gezaghebber Rijna durante su periodo ta atmití*

# Hopi kontra tempu

**KRALENDIJK** – “Dor di kontra tempu, mi a puntra mi mes, sí ainda mi ke ta Gezaghebber. E burokrasia i politika. Durante mi promé kuater, sinku aña komo Gezaghebber, mi tabatin di aber ku kasi shete diferente Kolegio Ehekutivo. Bo no por sigui bai dilanti sí ketu bai e gobièrnu ta keda kambia, kosnan ta keda pegá,” e èks promé mandatario a bisa den un entrevista.

Na aprel direpente Rijna a anunsiá ku e ta stòp promé ku su periodo terminá komo Gezaghebber di Boneiru. Den un entrevista ku Marit Severijnse di Caribisch Netwerk, Rijna ta konta di e motibu ku el a baha promé ku su término komo Gezaghebber.

Rijna a bira enviado spesial pa e tres munisipionan partikular den Karibe. Den su ròl nobo, e lo mester trese supsidio i proyektonan pa Boneiru, St. Eustatius i Saba, for di fondonan di Nashonnan Union Europeo i lo atendé ku relashonnan ekonómiko ku Latino Amérika. E anunsio ku e ta stòp komo Gezaghebber, pa hopi tabata inesperá.

Riba pregunta sí e di dos término lo dura te 2026, pero tòg e ta stòp promé ku esei, Rijna ta kontestá: “Tempu ku mi a kuminsá na 2014, mi tabatin un bista idealístiko. Mi ta bai kambia kos, pero e realidat ta otro. Mi ke solushoná kosnan lihé i tin biá mi tabata tambe un poko sin pasenshi, pero e ta asina frustrante.”

## Burokrasia i politika

Burokrasia i politika ta loke a asombrá Rijna mas. Durante su promé kuater, sinku aña komo Gezaghebber, e mester a atendé ku



kasi shete diferente Kolegio Ehekutivo. Bo no por bai dilanti sí gobièrnu ta keda kambio, kosnan ta keda pegá.

“Desde 10-10-10 Boneiru a krese hopi, pero nos aparato no a krese huntu. Bo tin pues tambe di aber ku un aparato gubernamental ku falta di personal, Bo ta mira tur kos pasa bo dilanti i bo no por keda bei di esakinan. Konstantemente bo ta solamente pagando kandela chikitu.”

Sí mira bèk kiko e ta haña komo Gezaghebber realmente e por a nifiká pa Boneiru. Rijna: “Mi tabata sí un faktor konstante den un periodo instabil, pero sí ku e sintimentu ku por a hasi hopi. Esaki mi ta haña lástima, gustosamente mi ke a hiba e aparato gubernamental riba kapasidat, atendé ku nos infrastruktura i e manera di proseder di Konseho Insular, djis pa menshoná algun kos. Pues mi no a logra, pero sí tempu pa traspaso.”

## Momentu di siña

Riba pregunta sí el a hasi fout komo Gezaghebber, Rijna ta kontestá: “Nan no ta fout, pero momentunan di siña. Mi no ta pensa tampoko ku e ta keda na Gezaghebber so, pasobra bo ta sintá komo un tim. Bo ta dependiente di henter e aparato i bo ta dependé di tur. Esaki ta hopi difísil pa regla tur kos. Pero durante un tempu

asina tabatin mester di hopi preshon i gustosamente mi ke a pone mas preshon. Mas ku e partidonan polítiko i gobernantenan sòru pa regla kos. E ora ei bo mester negoshá realmente politika. Papia i drai, balia tambe nos ta yam’é.”

E funshon di Gezaghebber ta un kuater dimenshon di wega di ahedres. Tur kos mester pasa asina presis promé ku bo por dal un bon paso sin tur kos kai den otro.

## Kontra tempu

Follow The Money despues di un investigashon a publiká ku e tabata amigu di doño di un hotèl kende el a primintí un pèmit pa pone un bich ilegal. Dor di esei e ta un gobernante kontroversial. Rijna: “Henter e asunto di Follow The Money i e konsekuensianan di esaki, tabata sí un kontra tempu di kua mi a pensa, di kon esaki ta sosodé. Mi tin hopi apresio di prensa, pero mi ta haña straño kon e periodista spesífiko akí ta traha.”

“Tur ta engaño ku mi por a prueba den e promé entrevista ku nan. Nan lo a laga mi mira e artíkulo promé ku publikashon, pero nunca esaki a sosodé. A saka tur kos for di konteksto i esaki seguidamente a bai biba su bida i abo mester biba ku e konsekuensianan.”

Ku a pon’é riba non-aktif pa siman siman, esaki nunca a sosodé. “Mi a tende na radio ku a manda Gezaghebber gewon ku fakansi, miéntas ku esaki totalmente no tabata asina. Semper mi a spera ku mi lo a hasi esaki dos biá seis aña, pero honestamente mi mester bisa ku e pu-

blikashon akí i tur kos rònt di dje, sí a okashoná un smak amargo den mi sintimentu pa e ròl di Gezaghebber.”

## Promoshon

Sí e ta haña ku el a keda degradá na un funshon diplomátiko tòp, manera nan ta bisa, Rijna ta mir’é otro: “Mi ta kontentu ku nan ta mir’é tambe komo un promoshon, pasobra asina mi tambe ta mir’é. Mi ta haña ku ainda mi por sigui sirbi Boneiru i lo sigui hasi esaki manera mi tabata hasié komo Gezaghebber.”

“Anteriormente ya mi tabata den un investigashon di Rijksrecherche tokante integridat, politika a hasi denunsia kontra mi, mi a sobrebibi moshonnan, tantu aki komo for di Den Haag. Sí en realidat tabatin algu robes, mi no por a haña un funshon. E ora ei mi no a keda promové.”

Pero esaki no ta solamente algun di e último lunanan òf solamente Follow The Money. Ta kasi konstantemente ta zag na bo stul su pia, tambe politika. Ku bo ta haña kontra tempu ku tòg bo ta bai pensa; “mi ke sigui hasi esaki”. E eskoho e ora ei ta bira mas fásil.

“Huntu ku esaki ta e momentu ku awor mi ta bai ta un momentu natural tambe. Nos tin un Konseho Insular i Kolegio Ehekutivo nobo, un Sekretario Insular, hefe di Kuerpo Polisial i Fiskal Mayó nobo. Bo ta mira realmente hopi renobashon, pues ta tempu pa un Gezaghebber nobo.”

## Responsabilidad

Riba pregunta ku e ta bai sinti falta di algu, Rijna a kontestá komo Gezagheb-

ber bo tin un tipo di outoridat ku inkonsientemente hendenan ta aserká bo. Serka tur kos ku pasa, bo mester ta pará kla pa eventual konsekuensia, reakshon, òf aserkamentu. E sintimentu di responsabilidad ei tabata 24/7 i nueve aña largu.

“Último ei tabatin algu riba media sosial riba kua mi ke a reakshoná. Mi tabata kla pa yama polis, dikon boso a hasi esaki asina. Pero mi a pensa, nò, no hasié. Esei ta duna e un banda di un alivio grandi i e otro banda bo ta pensa, mi falta algu? E ta un sintimentu di loke bo tin i direpente no tei mas.”

## Tipo di komedia

I e último dia a yega komo Gezaghebber. Rijna: “Mi a pensa, mi ta bai sinti falta realmente. Mi a bai Konseho Insular ku sintimentu miksto. Pero despues ku e reunion a kuminsá, atrobe tabatin pleitu. E momentu ei mi a pensa, mi ta kontentu ku aworó mi no tei mas. Éksito i ayó.”

“Mi ta bolbe bai piska, bai kunuku, sinta ku amigunan na snèkbar. Esaki mi a sinti falta di dje. Naturalmente mi famia i amigunan tambe tabatin un fergrotglas riba nos.”

“E situashon den Konseho Insular, tur e asunto polítiko i ku nunca bo ta hasié bon. Esaki naturalmente ta keda presentá públikamente. Pafó ta hasi chansa, pero asina kámara sende, nan ta bolbe kai den un sorto di komedia.”

“Por logra hopi mas na Boneiru sí traha huntu bon. Despues di kada reunion polítika mester puntra su mes: Kiko mi a kontribuí kuné pa mi isla.

Nos mester bira adulto polítiko.”



Djasabra awor 13 di mei

# Loge Harmonie ku dia habri

KRALENDIJK-- Djasabra awor Logia Harmonie ta tene un dia habri pa pueblo di Boneiru. E logia ta situá na Kaya Niki-boko Noord den edifisio di Scouting i ta di 10' or mainta pa 12' or di merdia.

Riba e dia aki algun miembro lo tene presentashon riba logia su manera di operá. Tambe por hasi pregunta i haña un bista di e edifisio.

Orígen di Logia Harmonie ta sintá den año 1877. Den e año ei e logia di mazoneria Harmonie a habri su porta na Boneiru. Despues di mas ku 140 año e lusnan di e logia, a sende bèk riba Boneiru. Mazoneria ta ofresé un método úniko na hòmbènan, pa traha riba nan mes emosional, spiritual i intelektual. Mas profundidat ta trese mas kresementu propio i e posibilidat pa ta un balor humano agregá pa mundu.

## Mazoneria

Mazoneria ta ofresé un



método pa diskubrí kiko bida ta nifiká ku ayudo di ritualnan i símbolo ku ta kondusí na desaroyo propio i fraternidad, ku finalmente ta kondusí na un mihó sociedad. Esaki mazoneria ta hasiendo kaba pa mas di 300 año.

E orígen ta bai hopi leu. Pero e historia asumí mas eksistente, ta esun di e gremionan di cantero di medio siglo. Esakinan no tabata kai bou di supervishon di misa òf outoridat di estado. Nan tayer o logia a bira un di hòmbènan di pensamentu liber, studiá i independiente.

Awendia mazoneria ta konsistí di un komunidad masha varia di tur edat,

vishon polítiko, i estudio, formashon kultural i posishon sosial. Loke ta konektá miembronan ta e boluntat pa bira un mihó persona. Pa nan mes i pa otro. Esaki por ta mental òf spiritual, esei ta loke ta traha riba dje.

## Logia

Legalmente e ta organisá meskos ku tur otro asosiasion; ku un direktiva, miembronan i reglanan. Spesífikamente pa mazoneria e kresementu personal ta partí den 3 grado.

Aprendis: figa riba di paden, wak bo mes di paden, tambe konosí pa “Ken u zelve”; Kompañero; di afó bin paden, haña bo lugá den sociedad, den harmonia ku bo ambiente i por último Maestro; bo ta konektá ku e misterio di bida, pa kada ken un sentimentu personal. Tur logia huntu a asosiá den e Orden di mazoneria, bou di e Gran Oriente di Hulanda.

## Bira mazon

Un di e motibunan ku miembronan aktual ta duna pa bira mazon ta di tin hopi amigu pero ta sinti falta di profundidat. Sali un ratu for di e preshon, tuma konsientemente tempu pa bo mes, huntu ku otro. Mazoneria ta ofresé un método ku ta duna hopi, si e persona mes invertí hopi. Ta mazón ta boluntario, pero sigur no ta sin kompromiso.

Ritualnan ta yuda ekspresá lokual no por pone den palabra. Esakinan

ta interpretá diferente pa kada miembro, den esaki ta liber. Asina ta mira e transformashon di e piedra bruta pa un piedra kuadrá komo formashon di abo komo persona. Enkuentronan di ritual ta formal. Esaki ta enserá momento ta den bachi ku regalia di mazón úniko.

Pa mas informashon por subi e wèpsait [www.loge-harmonie.org](http://www.loge-harmonie.org) Facebook Loge Harmonie Bonaire òf manda imeil na [logeharmonie.bonaire@gmail.com](mailto:logeharmonie.bonaire@gmail.com)

## KRESEMENTU TA DUNA FRUTA

“Ma fruta di e Spiritu ta amor, goso, pas, pasenshi, kariño, bondat, fieldat, mansedumbre, dominio propio;” Galationan 5:22-23a(BS)

Ora un persona planta un palu di fruta, e ta plant’e ku e propósito ku un dia e por disfrutá di su frutanan. Asina tambe den e kunuku di Señor. El a salba nos, Spiritu Santu a bin biba den nos i ta duna kresementu. Segun Spiritu Santu ta haña kontrol den nos bida, Su fruta ta bira visibel den nos. E fruta di Spiritu ta partí den tres sekshon: Amor, goso, i pas ta musta e relashon entre un persona ku Dios; Pasenshi, kariño i bondat ta musta e relashon entre un persona ku su próhimo; Fieldat, mansedumbre i dominio propio ta musta nos karakter komo kristian. Nos no por desaroyá e fruta akí den nos mes forsa, e ta fruta di Spiritu Santu. Ora nos dediká nos bida kompletamente na Kristu, nos por produsí e kalidat di fruta aki. Señor su propósito ta pa kada kristian duna fruta. “Boso no a skoheMi, ma Ami a skohe boso i a nombra boso, pa boso bai i duna fruta ...” Juan 15:16. Ora nos duna fruta nos ta glorifiká nos Tata selestial.

Pa nos duna fruta nos mester keda konektá na e palu berdadero. Señor Hesus a bisa: “Ami ta e mata di wendruif, boso ta e ramanan; esun ku keda den Mi, i Ami den dje, esei ta duna hopi fruta, pasobra separá di Mi boso no por hasi nada.” Juan 15:5.

Kòrda ku e fruta di kada kristian ta un otro kristian. Esaki ta e fruta ku ta bai ku nos te den eternidat.

Kon nos bida kristian ta awe? Nos ta dunando fruta pa Señor?

Wilfred i Sigried Antersijn

Produkshon PGM

## Programanan di Bonaire.tv

TELBO kanal 70

Flamingo TV kanal 23

**Djaweps 11 mei 2023**

12.00 Aktualidat: Anthony Nicolaas  
14.00 AkiBoneiru: Broertje Finies  
15.00 Herensia: Geoffrey A. Goede

16.00 Herensia: Ivan Sebastian Conradus (Zamuco)  
17.00 Dokumental: Lágrima Di Guera  
18.00 Herensia: 80 año Lelia Nicolaas  
19.00 BAPA: Sherman Kook

20.00 Herensia: Chamako Bembe ChichiTan  
21.00 Aki Hulanda: Charles Lebacs  
22.00 Herensia: Johanés Trinidad  
23.00 BAPA: Salomon (Monchin) Flanders

Tur mèrdia 12'or ta kuminsá un programashon nobo di 4 ora. E programashon aki ta ripití pa 24:00.



**Bonaire.tv**  
Historia | Kultura | Naturalesa



# Rebibando Boneiru di ántes

**KRALENDIJK** – Mas i mas e Boneiru ku hopi di nos a lanta haña ta bayendo pèrdí. Por ehèmpel e Boneiru ku su plasa di piská, trahá for di meimei di añan trinta.

Aki Dominga (Machi Mimi) Evertsz tabata sinta bende piská. Despues di tempu e plasa a bira lugá pa venezolanonan bende fruta

i bèrdura.

Resientemente sinembargo reporteronan di BONERIANO a topa ku esenan ku ta pone kòrda riba e époka ei. Dos piskadó, Raimi Thielman i Theo Soliana, tabata na e sitio aki. Nan tabata sakan-do mondongo i skamando piská. Pa ta eksakto, gristèlchi di laman afó, na ingles

yamá ‘rainbow runner’, pa motibu di e diseño manera regenbog riba nan kurpa.

Bunita tabata pa para mira, ora nan a kaba, kon e doño di Restorant Mona Lisa, Douwe Dooper, a akudí serka nan pa kumpratur piská ku nan a kue. E anochi ei sigur Mona Lisa tabatin ‘catch of the day’ riba nan menú.





# Klousura kampaña 'Polis di Bario'

**KRALENDIJK** -- En trante promé di febrüari, a bini repartishon nobo di e polisnan di bario na Boneiru. Durante e seis siman-

nan tras di lomba, Kuerpo Polisial Karibe Hulandes, KPCN, a pone lus riba agentenan ku ta funshoná komo polis di bario na Boneiru i

Sint Eustatius ku e meta pa komunidat por sera konosí mas di aserka ku e polis di su bario.

A start e kampaña na

Sint Eustatius i a sigui na Boneiru ku e polisnan di bario di Playa, Tera Kòrà, Rincon, Nort Saliña i Antriol. Kada siman un polis di bario tabata na turno. Komo parti di e kampaña a tene diferente entrevista na radio i televishon. Tambe a bishitá diferente tienda, instansia, skol i akohida di mucha kaminda a parti fo-yeto di informashon, pega poster i saka potrèt. Tambe a interkambiá ku habitan-

tenan.

Remarkabel ta desafionan ku habitantenan ta enfrentá i a trese dilanti na e polisnan di bario. Esaki ku e meta pa por yuda tuma akshon kaminda i na momentu ku ta nesesario. Entre otro iluminashon den barionan, ladronisia, molèster di kabritu i kachó, molèster di zonido prosedente di motosaikel, outonan ku ta kore ku velosidat haltu den áreanan habitá i





molèster di trùknan ku ta transportá karga, etc., ta kai bou di desafionan aki.

Bunita tambe tabata reakshonnan di habitantenan, entre otro ku awor nan ta sinti nan mas seif ku mas presensia di polis di bario i tambe ku nan sa kon i na ki momentu pa tuma kontakto.

Den e dlanan benidero ta pasa den e bario di Nikiboko i besindario, pa entregá

foyeto na habitantenan di e bario, pa asina nan por sa di ki forma por tuma kontakto ku un polis di bario. Pronto ta klousurá e kampaña ku e polis di bario na Saba.

Ku polis di bario, Kuerpo Polisial Karibe Hulandes ke duna e habitante di bario e sintimentu di siguridat i trankilidat pa biba. E polis di bario ke ta mas serka di e habitante, ke yuda pensa kuné ke ta atento pa kualke

situashon ku por surgi.

Mas presensia di polis den bario, ta aportá na un mihó komunidad i un mihó isla.

Pa drenta den kontakto ku bo polis di bario, yama 715-8000 durante oranan di ofisina i puntra pa polis di e bario. Den kaso di emergensia, semper yama 911. Un bon relashon ku polis di bo bario, ta kondusí na un bario seif.



Stichting Openbaar Onderwijs Bonaire  
Hanchi Amboina 2  
Antriol Pariba  
[www.stichtingooob.com](http://www.stichtingooob.com)

Stichting Openbaar Onderwijs Bonaire beheert twee scholen voor primair onderwijs.  
-Kolegio Rayo di Solo is een school voor regulier onderwijs met ongeveer 400 leerlingen.  
-Kolegio Strea Briante is een school voor leerlingen met specifieke leerbehoeften en heeft ongeveer 60 leerlingen.

#### Wij zoeken leerkrachten voor de midden-en bovenbouw voor beide scholen.

- Wil jij je grenzen verleggen?
- Is kindgericht onderwijs jouw passie?
- Durf jij de uitdaging aan om les te geven in een Nederlands onderwijssysteem aan leerlingen die de Nederlandse taal alleen op school kunnen leren?

Kom dan onze teams van gemotiveerde collega's versterken, die lesgeven aan leergierige, nieuwsgierige leerlingen in een veilig pedagogisch klimaat.

Op de website vind je informatie over de scholen, onze visie op onderwijs en hoe wij die vormgeven. Wil je meer weten over taalonderwijs in Caribisch Nederland lees dan Didactief Special jaargang 53, NO. 3, MAART 2023. Je kunt ook informatie inwinnen bij Hajo Renkema Interim Bestuurder SOOB, whatsapp +31618370975.

Enthousiast? Stuur dan je motivatiebrief met C.V zo spoedig mogelijk naar:  
[info@stichtingooob.com](mailto:info@stichtingooob.com).





# Despedida direktor Kámara di Komersio

**KRALENDIJK** -- Djaweps 9 di mei direktor di Kámara di Komersio Boneiru, Cherety Kirindongo, a tuma despedida di personal i partnernan di Kámara di Komersio.

Direktiva di Kámara di Komersio ta gradisí Cherety pa su dedikashon inkansabel den un periodo ku tabata prinsipalmente bou di dominio di e krisis di COVID-19. No opstante esaki el a logra pa sigui profesionalisá e organisashon i

hib'é na un nivel strukturalmente mas haltu.

For di promé di yùni Kámara di Komersio ta yama bon biní na Phar Martha, komo direktor nobo.

E ta entusiasma pa proveé Kámara di Komersio ku impulsanan nobo i pa sigui fortifiká e fundeshi.

Martha ta bon familiarisá ku Boneiru i partnernan di Kámara di Komersio.

E la traha pa Banko Maduro i resientemente pa TELBO.



## Arte teatral 'Kibra ku Bèrgwensa'

**KRALENDIJK** – 'Tei p'abo' ta organisá e arte teatral interaktivo 'Kibra ku Bèrgwensa' den kolaborashon ku naradó di storia, Archell Thompson. A krea e arte akí basá riba situashon real i e aktuashon ta trata di kon pa kibra ku e sintimentu di bèrgwensa.

E aktuashon interaktivo ta tuma lugá na Jong Bonaire, den un instalashon doméstiko i ta aktua a base di hunga ròl rekonosibel. Den e forma teatral akí, 'Tei p'abo' ke musta ori-

gen di bèrgwensa i kon pa kibra ku esaki.

Archell Thompson di orígen ta bini di Kòrsou. Na febrüari el a presentá ku diferente mayor i mucha di Boneiru den e arte teatral 'Show your talents' i na novèmber 2021 'Stop the beating'. Entretanto e no ta un hende desconosí na Boneiru.

Den forma di teater, 'Tei p'abo' ke pone atenshon na kibra ku bèrgwensa pa hasi e tema mas visibel i diskutibel pa públiko.

Huntu ku e públiko ta buska orígen di bèrgwensa, posibel solushon i tambe ta duna inspirashon na e bishitantenan kon pa atendé ku bèrgwensa.

E arte teatral ta grátis i ta tuma lugá dia 24 di mei pa 6'or di atardi na Jong Bonaire.

Pa asistí na e presentashon, por registrá via [rencommunicatie@rijksdienstcn.com](mailto:rencommunicatie@rijksdienstcn.com)

Tin espasio pa solamente 40 persona, pues registrá mesora pa sigurá un lugá.



**11 di Mei 2023**

**"Meskos ku mi Tata ta stima Mi,  
asina Mi ta stima boso ..."  
(cf Huan 15,9)**

E amor di Tata pa Hesus ta bira visibel pa nos pa medio di e obranan ku Hesus tabata hasi den Nòmber di Tata. Di otro banda Hesus su amor pa Tata ta visibel den su obediensia na djE (cf Huan 15,10b);

**"Hesus a bira obedesido te na morto,  
sí morto riba krus." (cf Fil 2,6-8)**

Pa su eksperiensia meimei di hende i ku hende, Hesus ta nota nesesidat di amor serka hende. P'esei E ta duna kristiannan e enkargo pa "Stima otro!" (cf Huan 15,12)

Anto no stima kon ku ta, pero "Stima manera

**El a stima nos! Pasobra El a stima nos,  
manera Tata a stima E." (cf Huan 15,9)**



**Señor, hasi nos kurason,  
pareu na bo kurason.**

**1L Ech 15,7-21; Salmo 96,1.3.10;  
Ev. Huan 15,9-11**



005999-522-4056



Un Snehil Pan



unsnechipan

## Workshop pa renobá sertifikashon di guia

*Djamar un grupo tremendo di guia di práktika di diferente kompania, a partisipá na un workshop pa renobá nan sertifikashon di guia. Di e forma akí nan a pone nan mes na disposishon pa sigui duna instrukshon, guia i evaluá stazjènan di MBO. ROA CN ta gradisí e partisipantenan pa nan aporte na e studiantenan i nan formashon.*





## Di Sinku Djadumingu di Pasku di Resurekshon,

**Promé Lektura** : Echonan 6, 1-7

**Salmo** : Salmo 33, 1-2. 4-5. 18-19

**Di dos Lektura** : 1Pedro2, 4-9

**Evangelio** : Huan 14, 1-12



E buki di Hechonan ta kon- ta nos, den e promé lektura, di e institushon di e ofisio diakonal.

E ofisio aki ta nase di un realidat entre e kristiannan primitivo di Herusalèm, ku ta kaminda ta forma e komunitatnan di kuminsamentu.

Herusalèm tabata e sentro spiritual di tur hudiu, sin importá na unda nan tabata biba. Maske ya hopi di nan a pèrdè e lenga materno, i mayoria tabata papia griego, no tabata motibu pa nan a stòp di praktiká nan religion, di manera ku e bishita na Tèmpel tabata algu obligá, maske esnan ku tabata biba leu tabata hasié ora nan tabata por.

Asta tabata eksistí serka hopi e kustumber, prinsipalmente si nan tabata piadoso, di bai pa muri na Herusalèm, i komo semper muhénan a biba mas largu ku e hòmbenan, pa regla general, den e siudat tabatin hopi biuda.

Kristianismo ta propagá su mes ku basta rapides den e diferente rangonan di sosiedat, i nan tabatin ku krea ko-

munitatnan den kua tabata tene e reunionnan na griego, na mes tempu ku den otronan tabata papia e lenga lokal.

Ta aki kaminda e kehonan di e helenistanan ta aparese, esnan ku únikamente tabata papia griego, afirmando ku esnan ku tabata papia arameo tabata neglighá e biudanan di e komunitat griego.

Ta pa esaki nos ta tuma nota ku, for di prinsipio, e práktika di karidat a kontra ku su difikultatnan. Pero ora ke sigui Hesukristu semper ta aparese un solushon.

Den e kaso aki ta e apòstelnan ta esnan ku ta present'é, sugeriendo kreashon di un grupo di hende ku ta dediká atenshon na problemanan material di komunitat, pa no kita tempu di e ministerio mes for di dirigenten ku tabata orashon i predikashon.

Mas despues a yama e hòmbenan aki "diákonos", ku su nifikashon ta "sirbidó". E sirbishi despues a bai ta transformando su mes pa otorgá e diákononan aki tambe un ofi-

sio litúrgiko, i e fakultat di prediká e Palabra, algu ku algun di nan lo a hasi ku hopi efikasía.

E diákononan tabata un yudansa masha positivo den Iglesia, i maske durante siglonan nan a dispersé den e rito latino komo institushon permanente, nos a rekuperá esaki danki na Señor i na Konsilio Vaticano II.

Den tur loke ta bon pa sernan humano nos por konosé Hesus i siguié mester ta bonbiní. Pero, lógikamente, ningun hende tin e kapasidat pa inventá pa su mes kuenta método di apostolado, sino ku tur kos tin ku ser someté na e outoridat kompetente.

E helenistanan di e promé tempu a presentá nan keho na e apòstelnan i ta esakinan tabata esnan ku, huntu ku e pueblo, a skohe e promé shete diákononan pa e sirbishi.

Iglesia a ser instituí pa Hesus p'asina e tabata, manera apòstel Pedro a bisa den e di dos lektura, rasa eskohí, saserdosio real, nashon santu, pueblo atkirí, pa anunsiá alabansanan di Esun ku a yama nan di skuridat pa su lus admirabel.

Algun ta afirmá ku komo ta únikamente Kristu ta salba, no tin nesesidat di pertenés na ningun iglesia, ya ku kada un pa su kuenta por tin su relashon ku Kristu.

Esaki ta un kibukashon grave ku hopi ta kometé. Nos no por ser salbá sin Hesus, pero tampoko sin ser parti di e "rasa eskohí" aki.

Si tabata di e otro forma, dikon nos mester di boutis-

suelo: "Den kas di Mi Tata tin lugá pa hopi hende. Si no tabata asina, lo Mi a bisa boso; Awor Mi ta bai aya, pa prepará un lugá pa boso".

Esaki ke men ku nos tur i kada un di nos, tur ser humano, nos lo tin e oportunidat pa okupá un di e kasnan di e Kas Paternal, Shelu. Tin lugá pa nos tur.

Pero nos no por lubidá ku pa logr'é nos tin ku kumpli ku un kondishon ku Hesus ta rekordá nos awe tambe: "Kere den Dios: kere tambe den Mi".

Esaki mester komplet'é ku loke E lo bisa nos mas despues: "Si boso stimami, boso lo warda mi mandamentunan" (14,15), ku nos lo bolbe skucha próksimo djadumingu.

Fe i amor ta e kondishonnan nesesario pa drenta pa medio di Hesus den Kas di Tata. Si nos ta kumpliando ku nan nos por ta trankil di ku nos ta riba e bon Kaminda. Si no, nos tin e oportunidat di kombertí nos mes sinseramente, distansiá nos mes di e kaminda robes riba kua nos ta kana, pa bai riba e úniko Kaminda, Hesukristu, ku ta nos Bèrdat i nos Bida.

El a prepará lugá pa nos. Si nos pèrd'é lo no ta pasobra E a deskriminá nos o no a muri pa nos. Nos lo ta e úniko nan responsabel di no tuma poseshon di e Reino ku E a gana pa nos.

### Plaka Falsu

Falsifikashon di plaka di papel i inkluso moneda ta masha na moda. Algun di e falsifikashonnan akí ta realmente kasi perfekto. Poko dia pasa riba televishon internashonal un polis spesialisista riba e tema aki a musta un plaka di papel di shen dòler i a komentá: "E ta asina perfekto ku hasta e medionan normal pa rekonosé nan, no ta detektá nan." Imitashon perfekto, pero "plaka di papel falsu".

Asina hopi bia tambe mentira ta. Tin "mentiranan perfekto". Tin mentira, bon, algun hasta "piadoso", mentira ku ta parse bèrdat, pero nan no ta laga di ta "mentira". Nan ta mentira perfekto, pero bèrdatnan falsu. Un plaka di papel falsu pa masha bon ku e ta falsifiká nunka lo ta un plaka di papel bon, e ta sigui di ta falsu i sin balor. Un mentira pa masha bon ku esaki ta bisá, pa perfekto ku e ta, semper lo ta un mentira i, por tantu, un "bèrdat falsu". Nunka e lo tin balor di bèrdat.

Tin "bidanan falsu", un bon imitashon,, pero nan lo sigui di ta bidanan sin balor algun.

Tin "amornan falsu", un masha bon imitashon, pero nan lo sigui siendo un amor sin balor algun.

Tin "fidelidatnan falsu", un estupendo imitashon, pero nan lo ta un amor mentiroso i engañoso.

No. No laga nos hasi ilushon. Riba merkado no únikamente ta sirkulá plaka di papel falsu, tambe bidanan falsu, amornan falsu, fidelidatnan falsu, piedatnan falsu, religionnan falsu. No semper lo ta fásil detektá nan, pero nan lo sigui ta falsu i sin balor algun. Un falsifikashon genial nunka lo ta un bèrdat chikí. E bèrdat maske e ta den kosnan chikí, semper lo ta un bèrdat grandi. Un plaka di papel outéntiko di dies florin ta bal realmente mas ku un plaka di papel di shen florin hopi bon falsifiká.

**Produkto i buki pa detòks pia**

Detòks pia ta yuda e kurpa saka tòksiko for di e igra, ta boost bo energia, ta redusí pèshi, ta redusí insomio i ta lagá bo lusí mihó.

Nos produktonan pa Detòks pia ta hasi uso di e mekanismo i prinsipio científiko di osmosis via bo planta di pia pa protehá bo mes kontra di infekshon.

Bo ta risibí e buki Detòks na balor di Naf. 50,00 i un pakete di 10 saku di produkto pa detòks pia durante 21 dia ku ta kosta Naf. 120,00 i bo ta paga Naf. 153,00 i risibí un High Tech Massage gratis aserka. Ku kada pago bo tin derecho riba un karchi di deskuento ku un balor di Naf. 25,00

Piramid Top Wellness Center; Menegrandeweg 2, huki Rio Canarioweg, Tel. 869-7733 of app. 520-8544



# Kruseronan di bishita serka nos

E dianan aki kasi tur dia tin barku di turista, krusero, di bishita den haf di Kralendijk. Pero nos no sa masha di nan. Nos ta mira nan komo djis un barku di turista mas. Pero nan tin nan historia. Den un seri di artíkulo BONERIANO ta dediká atenshon na e barkunan aki. Añanan pasá tambe a hasi esaki den Extra, pero tabata otro tempu i otro barku.

## Disney Magic

E dianan aki kasi tur dia tin barku di turista, krusero, di bishita den haf di Kralendijk. Pero nos no sa masha di nan. Nos ta mira nan komo djis un barku di turista mas. Pero nan tin nan historia. Den un seri di artíkulo BONERIANO ta dediká atenshon na e barkunan aki. Añanan

pasá tambe a hasi esaki den Extra, pero tabata otro tempu i otro barku. Disney Magic ta un krusero di propiedat operá pa Disney Cruise line, un supsidiario di The Walt Disney Company. E tin 11 dèk públiko i por akomodá 2.700 pasahero den 875 kamber. Tin un tripulashon di aproksi-

madamente 950 persona. E Interior di Disney Magic ta dekorá den Estilo Art Deco. E otro kuater barkunan ta Disney Wonder, Disney Dream, Disney Fantasy i Disney Wish.

E barku tin 20 boto di salba bida koló hel briante huntu ku e kolónan pretu, kòrá i blanku di



boto, ku ta korespondé ku e kolónan di Mickey Mouse. E kambio for di e standard oraño ta un eksepshon di e normanan marítimo internashonal. Meskos ku pitu di tur e kruseronan di Disney, nan ta reproducí un fragmento di "When You Wish upon a Star". Madrina " di Disney Magic ta Patricia Disney, èks-esposa di Walt Disney su sobрино, Roy.

### Konstrukshon

Disney tabatin diseño di krusero elaborá na febrüari di 1994. Disney Cruise line na 1995 a duna enkargo pa Disney Magic i Disney Wonder na Fincantieri na Italia. A konstruí barku den dos mitar na e waf Ancona di Fincantieri.

E biahe inougal tabata planeá pa 12 di mart 1998. Yanüari 1997, a rifa pasashi pa promé biahe di Magic riba e kanal Lifetime, miéntras ku benta di pasashi lo a kuminsá na sèptèmber 1997. Retraso den konstrukshon di MS Rotterdam a pone ku Disney Magic mester a kambia su fecha di inougalashon. Esaki a trese kuné ku e liña krusero na novèmber 1997, mester a reprogramá e biahe inicial pa 30 di aprel 1998. Sinembargo retraso

adishonal di e prove-donan i mal tempu na Fincantieri, a retrasá e biahe inougal aindamás ku algun luna.



### Entretenimento

Abordo di Disney Magic semper tin algu pa eksperensia. For di konosé personanan famosu di Disney te ku wak e último pelíkula di Disney bou di e strea. Tur momento na Disney Magic lo ta inolvidabel. Vários storia di Disney ta haña bida na Walt Disney Theater. Pa muchanan di te ku 17 aña tin klupnan pa mucha kaminda ta organisá aktividatnan durante henter dia. Ademas, e barku tin un pisina familiar grandi ku pista di slep i un pantaya grandi kaminda ta proyektá pelíkula di Disney. Pasaheronan por relahá na e 'wellness centrum'. Tambe tin vários oportunidat pa ta aktivo i hasi deporte. Ta organisá fiesta temátiko abordo kaminda por baila te ora di lat anochi. Esaki por tambe na e diskoteka Fathoms. Por disfrutá den un di e barnan òf salonnan di diferente bebida alcohólico. Disney Magic tin 4 restorant i 3 pisina.

## MONCHI & TONCHI

Papiamentu ta bo lenga. Kon bo ta papi'é i skirbi'é ta bo prerogativa.

Awèl sí. No laga NIUN hende hasibo insigur di esei!



### KOLOFÓN

Editor: Bonaire Communication Services N.V.  
Kaya Irlanda 12,  
Tel. 717-8482  
Redakshon: extrabon@gmail.com  
aviso: avisobon@gmail.com  
Wèpsait: www.extraboneiru.com  
Facebook: Extra Boneiru

Direktor  
Shirley Martis  
785-3824  
796-3824

Partner na Aruba  
Awe Mainta  
Partner na Kòrsou  
Extra  
Partner na Boneiru  
Live99

Redakshon  
Papi Antoin  
Nathaly  
Evertsz-Ipcendencia  
Velli Gijsbertha  
Edson Pietersz  
Ibi Piar (deporte)

Layout  
Maya Beaumont

Konsehero:  
Bòl Antoin  
786-6818  
Aviso  
avisobon@gmail.com



## STATIA/SABA/ST. MAARTEN

# Laura Linzey Daycare a pasa inspekshon ku bon resultado

**THE BOTTOM** – Inspekshon di Enseñansa di Hulanda a kondusí un inspekshon na e kalidat di Laura Linzey Daycare Center (LLDCC) dia 23 di yanüari 2023. Di akuerdo ku e inspekshon, e sentro di akohida a skor bon den término di monitòr e desaroyo di e muchanan, koperashon ku mayornan, implementá su vishon, ambishon i metanan i tin un maneho fuerte di implementashon i kalidat di kultura.

Banda di esei, e kua-ter standardnan ku a haña komo bon, tres di nan ta kalifiká komo sufisiente. Esaki ta relashoná ku e standard di provishon edukashonal, abilidad edukashonal pedagógiko i evaluashon, re-

sponsabilidad di diálogo.

E inspekshon a haña ku LLDCC a bin a hasi mehorashonnan bunita di e kalidat di kuido di e sentro, inkluso e kalidat di kuido i evaluashon, desde e inspekshon anterior na april 2022.

“LLDCC a hasi paso bunita ku respèt pa monitòr e desaroyo di e muchanan. Dunadónan di kuido awor ta mas konsiente di e importansia di monitòr e desaroyo. E opservashonnan spesífiko hasi ta sigurá ku e asuntunan di desaroyo ta notá,” segun e rapòrt.

LLDCC a koperá bon ku tur partner relevante na Saba. E koperashon akí a mehorá kompará ku e úl-

timo inspekshon. Nos ta konkluí ku ta informá mayornan adekuadamente tokante loko ta sosodé ku nan

yunan na e sentro, e rapòrt ta indiká.

E koperashon ku skol primario a mehorá i e sentro

di kuido di mucha ta koperá tambe intensivamente ku e programa BES(t) 4 Kids.



Staf di Laura Linzey Daycare Center ku algun di e muchanan.

# First-ever 10K' ta registrá éksito

**THE BOTTOM** – E promé ‘Saba 10K’ djasabra 6 di mei, a resultá eksitoso, ku 24 partisipante individual i seis tim di relevo di kua-ter persona kada unu. Un grupo di koredó entusiasma a bini huntu den oranan tempran di mainta na The Bottom pa partisipá na e kompetensia direkshon St. John. E promé partisipante ku a yega final tabata Alwin Hylkema, sigui pa Carlos Franco i Jermaine John. Claire Nuyens tabata e promé dama pa krusa e

liña final, sigui pa Sarah van der Horn i Zelda Meeuwssen. Di e timnan di relevo, Rock Runners, a yega promé, sigui pa Fulminatus i Saba Cares Saba. A entregá premio na e promé tres timnan, e promé tres damanan ku a yega final i e promé tres kabayeronan.

Premio spesial a bai pa Max di St. Maarten, e partisipante individual mas yòn. E partisipante mas yòn, Andrew, a partisipá den ekipo di relevo.





*Debí na falta di personal*

# CMC ta kanselá vários operashon

**WILLEMSTAD** — Curaçao Medical Center (CMC) lamentablemente mester anunsiá kanselashon di diferente operashonnan debí na un skarsedat enorme di personal. E situashon ta obligá hòspital pa limitá e operashonnan na solamente kuater sala di operashon operashonal, ku

e resultado di restriksion di sirugia esensial i agudo.

E faktor primario ku a kontribuí na e skarsedat di personal na CMC, ta debí na nuebe miembro di staf krusial ku ta ousente pa motibu di kebrante di salú pa un término largu òf ku a tuma retiro di trabou. E pèrdida inesperá aki di profeshonalnan kapasidat a trese un reto signifkante pa hòspital por mantené su kapasidat kompletu den salanan di operashon.

Pa por atendé ku e situashon di urgensia aki, CMC ta aktivamente tumando desishonnan pa reforsá e personal di sala di operashon. Hòspital ta hasiendo tur esfuerso pa reklutá personal di sala di operashon for di eksterior, ku e meta pa yena e skarsedat den e tim di operashon. E inisiativa pa reklutá internashonal ta pa trese personal eksperensiá ku por integrá fásil den e tim médiko eksistente i sigurá e continuidad di kolidat haltu di kuido.

CMC ta rekonosé e importansia pa invertí den e komunidad di kuido lokal

komo parti di e strategia pa un término largu. Hòspital ta komprometé pa desaroyonan i implementashon lokal di “training” nan i programanan ku IFE pa asistente di sala di operashon na Kòrsou. E programanan aki lo produsí aspirantenan individual ku e abilitat nesessario i e konosementu nesessario pa por traha efektivamente den salanan di operashon i alabes alsa e talento lokal i redusí e chèns pa dependé di rekursionan den eksterior.

Gerensia di Curaçao Medical Center ta pidi sinceramente diskulpa na tur pashènt ku ta wòrdu afektá debí na e kanselashon nan nesessario aki i ta sigurá tur pashènt ku tur esfuersonan aki ta wòrdu hasí pa minimalisá e impakto riba nan salú. Hòspital ta keda dediká pa duna prioridat na bienestar i seguridat di su pashèntnan, i ta tumando stapnan pa plania e operashonnan pa un otro fecha mas pronto posibel. E departamento di planifikashon lo tuma kontakto direkto ku e pashèntnan.

*Pa evitá impuesto dòbel*

## Komishon sentral a trata Tratado Internashonal

**WILLEMSTAD**-- Komishon Sentral di Parlamento a trata e proposishon di lei di Reino konteniendo aprobashon di e Tratado Internashonal entre Reino Hulandes, na nòmber di Kòrsou, i Repùblika Malta pa evitá impuesto dòbel i e prevenshon pèrdè impuesto relashoná ku entrada Valleta.

Djaluna 8 di mei, Miembronan di Parlamento a bin huntu den

un Komishon Sentral pa deliberá tokante e proposishon lei di Reino Hulandes, konteniendo aprobashon di e Tratado Internashonal será riba 18 di novèmber 2015 entre Reino Hulandes, pa Kòrsou, i e Repùblika Malta pa evitá impuesto dòbel i e prevenshon pèrdè impuesto relashoná ku entrada Valleta 18 di novèmber 2015.

Durante di e reunion, Miembronan di Parlamento a hasi vários pregunta i

remarke relashoná ku e tópiko. Meta di e reunion ta pa Komishon Sentral saka un relato ku pregunta i remarke dirigí na Tweede Kamer ku Minister di Asuntunan Eksterior mester kontestá.

Alabes Parlamento lo invitá un eksperto pa bin duna splikashon tékniko i proveé mas informashon tokante e proposishon di lei di en kuestion i otro tratadonan fiskal pendiente.

*Pa ladronisia i maltrato*

## Detenshon di hóben

**WILLEMSTAD**-- Kontinuando ku un investigashon relashoná ku un kaso di ladronisia i maltrato, polis a hasi detenshon di e hóben maskulino sos-

pechoso S.W.J., di 15 aña di edat nasé na Kòrsou.

E detenshon a tuma lugá djamars 9 di mei 2023, alrededor di 09.47'or na warda di polis Barber.

*Den kaso hogamentu*

## Identifikashon víktima

**WILLEMSTAD**-- E víktima di e kaso di hogamentu ku a tuma lugá riba djadumingu 7 di mei 2023,

a keda identifiká komo John Wilson Alvarez Ardila, nasé na Colombia dia 3 di yanüari 1976.



*Dr. Posner ta propone*

## Mester di 7.5 miyon dollar pa mehora infraestructura bicicleta

**ORANJESTAD** -- Por a lesa un post riba e cuenta di dr. Israel Posner, kende a expresa su preocupacion pa e hecho cu ciudadanonan no por practica nan deporte favorito di core bicicleta sin wordo ataca pa cachonan, sea di caya of esnan cu ta sali na careda for di tereno particular. El a bisa “mi kier core mi bicicleta, pero mi ta haya mi ta core pa cacho. Tur hende mi papia cu ne tin e mesun problema, tambe e turista nan,” Posner a bisa.

Debi na e preocupacion grandi aki el a ofrece un posibel solucion sostenibel unda cu tur hende lo keda contento. El a traha un plan cu a hiba e nomber: Aruba Bicycle and Stray

Dog Management Plan. E ta splica cu e plan profundo aki ta dirigi pa atende cu e falta di infraestructura pa ciclismo y e problemanan di cachonan riba caya na mesun momento. Y e ta un plan cu ta dividi den tres principal seccion.

1. Expansion di e red pa ciclismo
2. Control y maneho di e poblacion di cachonan di caya
3. Financiamiento y analisis di gastonan Expansion di e red di ciclismo

E meta di esaki ta pa crea un red sigur y accesibel di ciclismo rond Aruba. Pa logra esaki mester conduci un estudio di factibilidad pa identifica e localidadnan mas apropiada pa e

lineanan pa bicicletanan, trayectonan pa ciclismo y facilidadnan pa parkeo di bicicletanan.

Tambe ta papia di implementacion di medidanan pa calma e trafico y borchinan pa reforsa e seguridad riba caminda pa ciclistanan.

Ta propone un programa “bike-sharing” y educacionnan di ciclismo pa residente- y turistanan. Posner ta calcula cu e costonan involvi cu e proposicion pa loke ta creacion di infraestructura y su implementacion ta rond di 4 miyon dollar, un mey miyon pa estudio di factibilidad y planificacion, y otro un miyon dollar pa educacion y promocion di e proyecto aki.

Bou di capitulo dos tin e tema di control di e poblacion di cachonan di caya y maneho. E ta splica cu e obhetivo di esaki ta pa baha e cantidad of grandura di e grupo di cachonan di caya na Aruba via di metodonan humano y sostenibel.

Otro aspecto cu e ta conseha ta pa establece un colaboracion entre gobierno di Aruba, organisacionnan cu ta atende cu bienestar di animalnan. Y profesionalnan di e ramo veterinario. Implementa na gran escala un programa pa opera e cachonan di caya y amplia e servicio aki na un costo menor pa cachonan di cas.

Den e mesun rosea e ta sigui mencionando pa implementa e programa

Trap-Neuter-Return (TNR) pa cachonan riba caya y reduci e cantidad di casonan di reproduccion. Combina cu e puntonan ariba menciona mester crea un campaña publico di educacion riba doñonan responsabel pa nan mascota, incluyendo cuidu adecuado, vacunacion, y castramento y operacion di e animalnan aki.

Pa baha e cantidad di cachonan riba caya crea un programa di adopcion, hacie atractivo pa e hendenan participa den un programa asina’ki. Ta calcula e gastonan na 1.5 miyon dollar pa e programa di castracion y sterilizacion y TNR Program, un mey miyon dollar pa educacion di pueblo y esfuersonan pa adopcion

## Truck di awa a dal contra muraya di un cas

**ORANJESTAD** -- Diamars den careda di 11’or y mey di mainta, na Piedra Plat, un truck di awa, para riba un subida, pa un of otro motibo a bin abou, e la ranca un cura di palo, pasa over di caminda, ranca un borchu trafico y a bay dal straight contra muraya di un cas.

E truck a dal contra e muraya di un camber di e cas, e la causa basta daño

na e muraya di cas.

Suerte cu net na e momento ey no tabata pasando niun peaton of auto.

E habitantenan di e cas a spanta masha hopi mes despues di a scucha e zonido fuerte esaki na momento cu e truck a bay dal contra e muraya.

E muraya di camber caminda e truck a dal, ta camber di un meneer di edad halto, pa su suerte net na

e momento ey, e meneer no tabata den su camber. Mesora e habitantenan di e cas a pidi pa presencia di polis, na yegada di polis en berdad nan a bin topa cu e truck staciona cerca di e muraya di cas y despues cu polis a tuma tur datos a bin compronde cu e truck su papelnan no tabata na ordo. E truck no tabata tin seguro y pa e motibo aki polis a dicidi di confisca e truck.



## Candela grandi na Moko

**ORANJESTAD** -- Diamars merdia un biaha mas

esnan den area di Tanki Leendert, Tanki Flip y mas

pabou manera Hato tawata hayando hopi molester di

huma. Esaki tawata bin di un mondi grandi parti pabou di Parke Curason cu a wordo cendi na candela.

Un patruya den cercania mesora a bay tira bista, mirando con hopi huma esaki tawata produci. Na su yegada ya un unidad di Brandweer tawata combatiendo e candela, cu a expande ariba un area hopi grandi.

Despues di algun ora,

bomberonan a sa di combati esaki, den un solo fuerte di merdia.

E problema cu e candela aki tawata cu door di e biento duro esaki a expande mesora. Polis lamentablemente no a topa cu e persona cu cende e candela, parce cu e persona aki ta kima koper y door di e esaki e la mondi a pega candela.





# Flamingo ta duna instrukshon

*E ekipo di futbòl Flamingo ta preparando pa su próksimo enkuentro di e torneo di futbòl Kopa Dia di Boneiru. Pa esaki shon flamingo a presentá na tereno di ATC pa asina duna instrukshon na e ekipo di lopi, promé ku e partido entre e formashon di flamingo i lopi tuma lugá.*



## Próksimo kareda Hotwheels 4 yüni

**KRALENDIJK** – E organisadó di e kareda di Hotwheels durante dlanan di fiesta ta yama danki na tur ku a yuda hasi e kareda di

Hothwheels na Rincon posibel.

Ta trata di Curoil, Good and More/New Asian Shop i Zabb Travel. Na Live FM,

Voz di Boneiru i Radio Flamingo, pa e espasio den nan programa di deporte. Na Judo Club Rincon pa por a hasi uzo di e lugá.

Awor tur e kategorianan tin un rekòrt nobo. A kibra

rekòrt di outo ku a partisipá ku ta 514 outo. Aña pasá e rekòrt tabata alrededor di 300 outo.

Danki tambe na tur ku a partisipá i yuda pa transportá e pista, danki na boso

tur ku e deporte ta krese pa sigui bira mas grandi.

Keda pendiente pa e próksimo kareda di Hotwheels ku ta dia 4 di yüni na Coconut Carwash.



### Selekshon ta sali sin niun hende pa kubri gastu

**KRALENDIJK** – Seleksionnan di deporte ta sali pa eksterior o talbes pa islanan den serkania, entre otro nos islanan ABC, sin niun hende pa kubri esakinan pa duna informashon tokante esaki.

Seleksionnan di deporte ta sali i podisé ta bisa algu kòrtiku i no komplemento tampoko, tokante e selekshon.

Awendia mayoria seleksionnan ku ta sali pa representá nan isla o pais, ta sali ku un persona pa hasi e trabou aki, ku e tarea pa informá i duna tur informashon di e selekshon, su enkuentronan i resultadonan etc etc.

Antes ku salimentu di

nos seleksionnan eskolar pa representá nos isla den e enkuentronan interinsular anual, gobièrnu tabata sòru pa un hende ku por hasi e trabou, ku e tarea pa kubri esakinan, esta skibi i saka potrèt.

Di e forma aki tabata informá tur medionan di komunikason di Boneiru ku na nan turno tabata informá nan komunidad di esakinan.

Awendia ku kosnan a bira muchu mas mihó kompará ku ántes, nos ta fayando drástikamente ku esaki.

Awendia tin hopi hende ku por hasi e trabou pero tòg e no ta tumando lugá.

## Janiro Chatlein kampion invikto bola-8

**KRALENDIJK** -- Janiro Chatlein e siman aki a bira kampion invikto di e promé 8 hungadónan Ranking Biliart Bola-8, di akuerdo ku e informashonnan di e FeBiBo ku ta e federashon di biliart di nos isla.

Den e partido final Janiro Chatlein a gana Randolph Cicilia 8-5.

Esaki ta resultado di kampionato ranking bola-8.

Janiro Chatlein kampion invikto promé 8 hungadónan.

Randolf Cicilia supkampion.

Di 3 lugá ta Milton Anthony.

Di 4 lugá a keda Marvin Abdul.

Di 5-8 lugá.

Marnix Abdul.

Giancarlo Cueva.

Julius Clarendia.

Yamir Jiumenez.

E próksimo evento lo ta Bola10 di 22 pa 30 di mei 2023.





# AVIASHON

## ‘Transvertragia’ tei atrobe

**KRALENDIJK** -- Transavia e fakansi di mei akí obligatoriamente mes- ter a anulá hopi buelo. Es- aki no ta promé biá durante su eksistensia ku esaki ta tuma lugá serka e kompa- nia di aviashon. Anterior- mente e flota di Transavia tabata konsistí di 45 avion. No por usa shete di nan debí na asuntunan di serti- fikashon di siguridat ku no ta laga spera di dje mas tantu, problemanan tékniko i trabounan di reparashon inesperá.

E kompania última-

mente a buska dos avion nobo pa remplasá esnan for di servisio. Ta trata di un Boeing

757 di e kompañia di avi- ashon spañó Privilege Style i un Airbus A320 di Sundair di Alemanía. E promé a yuda Transavia pa ehekutá buelonan di Amsterdam pa Gana i Heraklion. Desde e tempu ei e 757 no a bin mas den akshon pa e kompania ruman di KLM.

E di dos a realisá apé- nas un buelo di Amsterdam na Preveza, un estado di Gresia. Desde e tempu ei

e A320 di Transavia no a transportá pasahero mas.

Apesar di e yudansa di e dos avionnan ku a pone riba un base di lease, esaki no ta sufisiente. Na mei i yüni Transavia a anulá mas buelo ku a spera, pasobra simplemente e falta tabata muchu grandi i no tabatin opshon pa pone otro avi- on. Hasi un apelashon riba avionnan di KLM, ku den pasado a yega di hasi buelo pa su kompania ruman, no ta posibel tampoko.

Ku e kompania aktu- almente tin e diferencia

akí, ta zona no konosí den oreá di analista di data na EU-Claim, Paul Vaneker. Transavia a skohe pa no hasi mas reservashon pa fakansi di mei. Dies aña

pasá tambe e kompania a hasi esaki. ‘Transvertragia’ a yam’é tempu ei. E bue- lonan tabata kai afó manera piedra di dominó. Esaki ta mira awor akí atrobe.



## KLM ta amplia flota ku avion di tres aña bieu

**KRALENDIJK** – E si- man ku a pasa KLM a am- plia su flota 787, ounke ku e ta e mas resien Dreamliner. E avion no a sali for di fá- brika.

E 787, ku ta regis- trá komo PH-BKI, a sali djaweps kuartu pasá di dos

di mèrdia for di e fábrica di Boeing na Everett pa Schi- phol. Despues di ocho ora i tres kuart, e buelo KL9874 a aterisá riba Oostbaan, e pista di mas chikitu di e aeropuerto.

For di informashon di Flightradar24, por mira ku

e 787 seguidamente a kore bai na e hangar di KLM. Te na e momentu akí e avion ketu bai ta pará ei nan. Ki dia e avion ta realisá su promé buelo komersial, no ta konosí.

Ku e PH-BKI, aktual- mente KLM tin 22 Dream- liner den servisio. E avion ku a aparesé djaweps riba suela hulandes, ta e di nueve 787-10, e otronan ta 787-9.

Ounke ku e avion a djòin komo último serka e flota di 787, no ta asina ku e tin so- lamente algun luna bieu.

E PH-BKI ta entre tan- tu den su di tres aña. Na yüli 2020 e avion a hasi su promé buelo i dia 26 di ougùstùs e último. Segui- damente e Dreamliner e aña ku a pasa ainda a hasi un kantidat di buelo dentro di Estádus Unídos.

E retraso tin di aber ku supervishon fuerte di Fed- eral Aviation Administra- tion (FAA). Diferente pro- blema den e produkshon a sali na kla e último añanan dor di kua a para entrega di Dreamliner.

Na 2021 e fabrikante di

avion merikano a informá ku e último añanan a pro- dusí algun piesa defekto. Algun piesa di titanium tabata mas suak ku tabata deseá. Na 2022 Boeing a reanudá e entrega di e 787, pero mesun aña a konstatá lèkmentu di awa.

Na mart FAA a aprobá e solushonnan di e problema akí dor di kua a reanudá e entrega di nobo.

Dor di tur esaki KLM a risibí su di nueve 787-10 hopi mas lat ku planiá.



## Bida nobo pa MD-10

**KRALENDIJK** – Desèmber último FedEx a tuma despedida di e úl- timo MD-10, e avion ku e kompania aéreo di karga a usa pa desénas. Entre tantu tur e último avionnan a bai Victorville. Parse ku seis di e tres avionnan MD-10, nunka mas a hasi uso di nan.

Julio Marquez, direk- tor general di JMB Avia- tion Group, a konfirmá ku e kompania a tuma seis MD-10-30(F) di FedEx. Ta agregá por lo ménos kuater na e flota di Cargo Three, N307FE, N313FE, N315FE i N316FE.

E base di e avionnan aki ta bira Panama Pacific In-

ternational Airport.

E di sinku MD-10-30(F), e N311FE, ta bai direkshon Transcarga International Airways. E avion akí ta haña aeropuerto di Caracas komo base.

No ta konosí ainda unda JMB Aviation Group ta bai pone e di seis MD-10, probablemente ta trata di e

N319FE òf e N306FE. Debí na e historia di e úl- timo akí, tin un petishon pa

duna e avion akí un sitio den un museo.





# Sel Goedgedrag informando su mes

**KRALENDIJK** – Luna di aprel último e korant aki, BONERIANO, a kumpli su di tres aniversario. Hopi a kere ku un propio korant diario di Boneiru no ta posibel. Pero BONERIANO t'ei. El a yega i pega.

BONERIANO no tabata un yu planeá. Nunka tabata intenshon di Bonaire Communication Services N.V., representante di Extra, pa saka un korant boneriano. Pero Covid a yega i mester a bini un alternativa.

Bòi Antoin, kende a bini ku e idea pa kuminsá ku BONERIANO, a splika:

“Nos tabatin mínimo 12 página den Extra.

Na momentu ku Covid a bini esaki no tabata posibel mas. Extra a baha su kantidat di página na 32. Nos no por a haña mas página. Nos a kuminsá ku BONERIANO ku solamente 12 página, despues a bai 16 i awor tin mínimo 24 página.”

BONERIANO a bira e ruman chikitu di Extra, ku ketu bai ta un korant fuerte na Boneiru.

Hopi hende ta les'é tur dia, tantu e korant di papel komo e vershon digital.



Sel Goedgedrag lesando su korant faboritu BONERIANO.

*Popularidat ta relativo  
P'esei un propio estilo  
No solamente pa ta eksitoso  
Sino sigur mas balioso*

**BròKèS 93.5 FM**

*pokopoko pero sigur mas i mas hende ta ...*

*Skuch'e*

Telefon/ WhatsApp +599 701 0935  
[www.radio935bonaire.com](http://www.radio935bonaire.com)



20 Kg Semiauto Wasing Machine

SPECIAL PRICE

**\$495**

16 cuft. Inverter Refrigerator

**\$859**



Free-standing Dishwasher

**\$829**



Smart shopping ▶ Better living

**THANK YOU MOM!**



Sectional Sofa

**\$649**



Sliding-doors Wardrobe

**\$295**



Queen-size Bed

**\$575**